

晉文公出畝逐獸入大澤迷不知所出其中有渙者文公謂曰  
我若君也道將安出我且厚賜若渙者送出澤公將賞之渙云  
君尊天事地敬社稷薄賦斂以移巨汭與焉君不尊天不事  
地不敬社稷外失禮於諸侯內近人心一國流亡渙者雖有厚  
賜不得保也遂辭不受貞觀政要



印  
二  
卷之二  
三  
三



却賜獻規

齊宣王獵於社山社山父老十三人內有閻丘先生賢人也相與勞王王賜父老不租父老皆謝先生獨不拜宣王曰少也復賜無徭役先生復獨不拜王曰父老幸勞之故答以二賜先生獨不拜何也閻丘曰聞王之賜更有所求望得壽得富得貴於大王也王曰死生有命脩短繫天無以壽先生倉廩備災出納矢慎無以富先生大官無闕小官卑賤無以貴先生閻丘曰非所敢望願選良吏平法度如此臣可少得壽焉恤鰥寡存孤獨賑乏以時臣得富焉令子事親少敬長

注昭然臣得貴焉宣王曰善哉

太平御覽

魏文侯御廩天君臣素服廩者寡人實之所藏也今少海諸侯藏於境內入六藏於家庶人藏於篋實非其所藏不有天災必有人患今幸無人患乃有天災不亦善乎文侯喟然嘆曰善問奇類林





藏寶百姓

晉平公藏寶之臺焚士大夫趨救三日三夜乃勝之公子獨束帛而賀甚善平公勃然作色曰珠玉之所藏也國之重寶也而天火之子獨稱賀何也有說則生無說則死公子曰何敢無說臣聞王者藏於天下諸侯藏於百姓商賈藏於篋匱今百姓短褐不蔽形體糟糠不克口腹賦斂無已收大半藏之於臺是天以火之臣聞之昔者夏桀殘賊海內賦斂無度萬民甚苦是以成湯誅之為天下戮笑今皇天降災於藏臺是君之福也而不自知變悟亦恐君之為鄰國笑矣韓詩外傳

宋伊川與容曰君子欲才過德不欲名過實不欲文過質才德者不祥名過實者有殃文過質者莫之與長知非錄



御世二風  
卷之二十一  
三二



才德要論

夫才與德異而世俗莫之能辨通謂之賢此所以失人也  
聰察彊毅之謂才正直中和之謂德才者德之資德者才  
之帥也是故才德兼全謂之聖人才德兼亡謂之愚人德  
勝才謂之君子才勝德謂之小人君子挾才以爲善小人  
挾才以爲惡挾才以爲善者善無不至矣挾才以爲惡者  
惡亦無不至矣愚者雖欲爲不善智不能勝力不能週譬  
之乳狗搏人人得而制之小人智足以遂其奸勇足以決  
其暴是虎而翼者也其爲害豈不多哉自古以來國之亂  
臣家之敗子才有餘而德不足以至於顛覆者多矣

綱目

宋司馬光請立經明行脩科歲委升朝文臣各舉所知以勉  
勵天下使敦士行以示不專取文學之意若所舉人違犯名  
教必坐舉主毋赦則自不敢妄舉而士之居鄉居家者惟懼  
玷缺外聞不待日訓月察立賞告訐而士行自美矣 通鑑





選舉賢能

夫古之用人德行爲首才能次之虞朝亦有九德周家賓興考其德行於才不屑屑也兩漢以來刺史守相得以專辟召之權魏晉而後九品中正得以司人物之柄皆考之以里閭之毀譽而試之以曹掾之職業然後俾之入備王宮以階清顯蓋其爲法雖有愧於古人德行之舉而猶可以得才能之士也至於隋皆命銓曹悉由於科目所按者資格而已自科目取士所試者詞章而已三代之時法制雖簡而考核本明毀譽旣公而賢愚自判後世巧僞日甚而法令滋多遂以科目取士選賢與能無復存矣 尚書

東魏高澄爲廷尉杜弼攝行臺左丞問以政事之要可爲戒者使錄一二條弼請口陳之曰天下大務莫過賞罰賞一人使天下人喜罰一人使天下人懼苟二事不失自然盡美澄大喜曰言雖不多於禮甚要

通鑑總類





刑賞貴平

夫刑賞之本在乎勸善而懲惡帝王所以天下畫一不以親疎貴賤而輕重者也今之刑賞或由喜怒或由好惡喜則矜刑於濫中怒則求罪於律外好則鑽皮出羽惡則洗垢索瘢蓋刑濫則小人道長賞謬則君子道消小人之惡不懲君子之善不勸而望治安刑措非所聞也且暇豫而言皆敦尚黃老至於威怒則專濫申韓故道德之旨未弘缺薄之風先搖昔州犁上下其手而楚濫以敝張湯輕重其心而漢刑以謬況人主而自高下乎自古欲治之君必先德化至暴亂之世始專任刑濫此刑賞所以貴慎

白孔六帖

子路鼓琴孔子聞之謂冉有曰甚矣由之不才矣夫先王制音也故君子之音溫柔居中以養生育之氣憂愁之戚不加于心暴厲之動不存於體乃所謂治安之風小人之音反是乃所以為亂之風 集事淵海





德薄致疾

晉平公召師曠奏清徵之音時有玄鶴二八來舞於庭平  
 公大悅坐者皆喜平公起而提觴為師曠壽反坐而問曰  
 音莫悲於清徵乎師曠云不如清角平公曰清角可得聞  
 乎師曠云不可昔黃帝駕象車交龍畢方風伯進掃雨師  
 灑道大合鬼神太山之上作為清角今主德薄若聽之恐  
 有敗平公曰寡人老矣願遂聞之師曠不得已而鼓之一  
 奏有雲西北起再奏暴風至大雨澧沛裂幕破俎墮瓦凡  
 坐者皆走平公懼伏於室側身遂作疾晉國大旱赤地三  
 年不務德治而好五音則窮身之事非正器也

古今遺史

宋李若谷為長社令日懸百錢於壁用盡即止與客云口腹之欲何窮  
 之有每加節儉亦是惜福延壽之道 問奇類林



知十... 卷之二

三



侈慢恙身

唐柳公權上大醫箴曰惟天布寒暑不私於人品類既一  
 崇高以均清靜無瑕輝光以新寒暑滿天地之間浹肌膚  
 於外好愛溢耳目之前誘心志於內飲食所以資身也過  
 則生恙衣服所以表德也侈則生慢惟過與侈恙必隨之  
 聖心不惑孰能移之畋遊恣樂流情蕩志馳騁勞形叱吒  
 傷氣惟天之重從禽為累不養其外前脩所忌巧必喪真  
 智必誘情去彼煩慮在此誠明為之上者理於未然患居  
 慮後防處事先德施萬物以享億年聖人在上各有攸處  
 庶政有官羣藝有署臣司大醫敢告諸御上嘉納之

冊府元龜

宋永寧公主因侍坐與皇后同言曰官家作天子日久  
 豈不能用黃金裝肩輿以出入太祖笑曰我以四海為  
 富當節用豈可妄費古稱以一人治天下不以天下奉  
 一人苟以自奉養為意天下之人何仰哉通鑒





節儉是寶

國朝太祖十九年典營繕者進宮室圖太祖見其雕琢奇麗者即去之謂中書省臣曰宮室取其完固而已何必過為雕斲昔堯時茅茨土階采椽不斲可謂極陋矣千古之上稱盛世者必以堯為首後世競為奢侈極宮室苑囿之娛窮輿馬珠玉之玩欲心一縱卒不可遏亂由是起矣夫上崇節儉則下無奢糜吾謂珠玉非寶節儉是寶有所締構何必極雕巧以殫天下之力也朕富有四海豈吝於此然所謂儉約者非身先之何以承下小用不節大費必至開奢泰之原啓華麗之漸未必不由小而至大也

皇明 寶訓

漢文帝即位二十三年宮室苑囿車騎服御無所增益有不便輒弛以利民嘗欲作露臺召匠計之費百金帝曰百金中人十家之產也遂止身衣弋絺所幸慎夫人衣不曳地帷帳無文繡以示敦朴

通鑑總類





節儉敦朴

天地節而四時成節以制度不傷財不害民其義大矣然而治國之道富民為始富民之要在於節儉堯尚茅茨而萬國安其居禹卑宮室而天下樂其業夫聖世之君存乎節儉富貴廣太守之以約睿智聰明守之以愚不以身尊而驕人不以德厚而矜物舟車不飾衣服無文士階不崇大羹不和非憎榮而惡味乃處薄而行儉故風淳俗朴比屋可封自古勤儉以勸天下必以身先之今欲減省浮費莫如自宮掖始樽節用度則宜以在上為始今裁損諸費不先於貴近者則疎遠之人安肯甘心而無怨乎

聖訓子心法

齊晏子朝乘敝車駕駑馬景公遺賜輅車乘馬三不受曰輅車乘馬君乘之上臣乘之下民之無義侈其衣食而不顧其行何以禁之卒不受

說苑



世仁風 卷之二 四十五



儉德隆長

天地所生財物固以供人之用然必樽節愛惜若有不得已而後用之之意雖所處有餘常懼不足方能用度相繼倘務奢侈淫縱任意妄費不惟所用易竭而暴殄天物必為造化所忌安能久享福祿乎夫地力之生物有大數人力之成物有大限取之有度用之有節則常足取之無度用之無節則常不足生物之豐歉由天用物之多少由人天地間為人為物皆有分限分限之外不可過求亦不得過用暴殄天物得罪於天聖人以道德為麗仁義為樂故雖茅茨土階惡衣菲食不恥其陋

省心集要

性理

綱目

宋范忠宣公問職有親族子弟請教於公公曰惟儉可以助廉惟恕可以成德其人書於座右終身佩服純仁平生奉養無重肉不擇滋味粗糲每退自公服易短褐率以為常至老始終如一

自警言編





崇儉寶箴

夫口腹之欲何窮之有每加節儉亦是惜福延壽之道節儉之益非止一端大凡貪淫之過未有不生於奢侈者儉則不貪不淫是可以養德也人之受用自有劑量省嗇澹泊有久常之理是可以養壽也醉濃飽鮮昏人神志若蔬食菜羹則腸胃清虛無滓無穢是可以養神也奢則妄取苟求志氣卑辱一從儉約則於人無求於己無愧是可以養氣也知滋味以害性故棄而不營老氏以為一寶若夫口腹不節致疾之因念慮不正殺身之本驕富貴者戚戚安貧賤者休休所以景公千駟不及顏子之一瓢

綱目省身集要



宋英宗時司馬光為科舉法上疏云為政得人則治然人之才或長於此而短於彼雖臯夔稷契各守一官中人安可求備若指瑕掩善則朝無可用之人苟隨器授任則世無可棄之士

通鑿




能用其材

古者國家擇將之道惟審其才可用也不以遠而遺不以  
 賤而棄不以詐而疎不以罪而廢故管仲射鈎桓公任之  
 以霸孟明三敗繆公將之以勝穰苴拔於寒微吳起用於  
 羈旅馮儀之游蕩樂毅之疎賤孫武之瓦合白起之世舊  
 韓信之懦怯黥布之徒隸衛青人奴去病假子孔明不親  
 戎服杜預不便鞍馬謝艾以叅軍摧石虜鄧禹以文學扶  
 漢業李靖用於罪累李勣收於降附是豈以形貌閎闊計  
 其間哉而庸人論將常拘於器質失古人用材之意皆由  
 道德未明何以能安邊疆治民富壽而勇於謀畧哉

武經節要

宋曹彬伐蜀諸將多受子女玉帛彬囊中惟圖書而已及下江南不  
 妄戮一人官至樞密封魯國公清介廉謹仁敬和厚有功不伐位兼  
 將相不以等威自異為時良將第一 兵機纂要





將材八良

夫將材有八道之以德齊之以禮而知其饑寒悉其勞苦  
 此之謂仁將臨事無苟免不為利撓有死而榮無生以辱  
 此之謂義將貴而不驕勝而不恃賢而能下剛而能忍此  
 之謂禮將奇變不息動應有端轉禍為福困危而勝此之  
 謂智將進有良謀退有嚴刑賞不逾時刑不擇貴此之謂  
 信將足輕戎馬氣益千夫善用短兵長於劔戟此之謂步  
 將登高歷險馳射若飛進則先行退則後殿此之謂騎將  
 氣高三軍志輕強虜怯於小戰勇於大敵此之謂猛將見  
 賢若不及從諫如順流寬而能剛簡而能詳此謂大將

武侯心法

齊管子云選賢論材而待之以法舉而得其人坐而收其福不可勝收也官不勝任特  
 走而奉其敗事不可勝救也故曰主道得賢才遂百姓治治窮在士而已矣主身者正  
 德之本也官治者耳目之制也身立而民化德正而官治是故君子不求於民 諸子評苑





才達品宜

夫世無全才久矣今之用人不審其才之所堪資格所及  
 雜然授之刑名典文銓操兵務養之不得其道用之不當  
 其才受之者但悅美秩而不自量以此而欲求濟其事豈  
 不難哉古昔學校各養其才之所近而質性英發能備眾  
 長者各任其所長夫資有所近習有所通施之政事必有  
 可觀蓋古者以仕學為一事今日分體用為兩截窮居草  
 澤止事詞章一入廟廊方學政事雖有明敏英達之才豈  
 能觀政數月便得每事盡善不免鹵莽施設鶻突支吾苟  
 不大敗輒得遷陞以此用人雖堯舜亦不能治也

呻吟語

詩云相鼠有體人而無禮胡不遄死是故夫禮必示於天殺於地列  
 於鬼神達於喪祭射御冠婚朝聘聖人禮以示之天下國家可得而  
 正也 詩經





禮貴身脩

夫禮者所以定親疎決嫌疑別同異明是非也脩身踐言  
 謂之善行行脩言道禮之質也道德仁義非禮不成教訓  
 正俗非禮不備分爭辨訟非禮不決君臣上下父子兄弟  
 非禮不定宦學事師非禮不親班朝治軍涖官行法非禮  
 威嚴不行禱祠祭祀供給鬼神非禮不誠不莊故聖人作  
 為禮以教人使人以有禮知自別於禽獸人有禮則安無  
 禮則危禮者不可不學也夫禮自卑而尊人雖負販者必  
 有尊也而况富貴乎富貴而知好禮則不驕淫貧賤而知  
 好禮則志不懾是以君子恭敬樽節退讓以明禮

禮記

周文王問太公曰何為之寶公曰農粟為大寶玉次  
 之心庵云三冬無衣而亡七日無食而死農粟非寶  
 而何 為政九要





農為政本

夫三農九穀為政所先萬箱億庾是曰民天繫稱斲耜書  
 美厥田花開杏樹凍解新泉當使黍稷莫莫民翳胥樂甘  
 雨祈祈遂及我私我私之熟表裏禔福禔福中田歲取十  
 千是薦是養登頌有年正位恭已體元得一望之如雲就  
 之如日郊廟致敬山川咸秩教先大道學敦儒術憲章載  
 記殷鑒周宣廻輿南畝駐蹕東廛親耕帝藉躬稼大田方  
 期多稼介此豐年富實教資農惟政本上敦播植下勤薦  
 養榮辱既著淳朴可反禮節既興登封何遠元良育德維  
 城作固股肱周召爪牙信布比漢之兆方周之祚

冊府元龜

明于拙子務本歌云理國脩齊治世興農務本為先牧民  
 須要得良賢積穀安邊惟范德政人君自勵官常仰體清  
 廉黔黎耕耨稅無繁未享 皇仁福遠 請品集載






### 富國以農

大凡治國之道必先富民民富則易治也民貧則難治也  
 奚以知其然也民富則安鄉重家安鄉重家則敬上畏罪  
 敬上畏罪則易治也民貧則危鄉輕家危鄉輕家則凌上  
 犯禁凌上犯禁則難治也故治國常富而亂國常貧是以  
 善為國者必先富民然後治之昔七十九代之君法制不  
 一號令不同然俱王天下者何也必國富而粟多也夫富  
 國多粟生於農故先王貴之凡為國之急者必先禁末作  
 文巧末作文巧禁則民無所游食四民交能易作終歲之  
 利無相妨也故人主之大務惟在於富民而有恒產也

諸子評苑

漢文帝三年春謂羣臣曰農天下之本也黃金珠玉饑不可食寒不可衣間歲不登農民憂也令郡國務勸農桑益種樹可得衣食吏發民若取庸采黃金珠玉者坐贓為盜頒詔行焉

君覽





國本民耕

夫衣食者民之本也民者國之本也民恃衣食猶魚之須水國之恃民如人之倚足魚無水則不可以生人失足必不可可以步國失民亦不可以治先王知其如此而給民衣食天子親耕於東郊后妃躬桑於北郊上可以供宗廟下可以勸兆民故建國者必務田蠶之實以穀帛為珍寶故先王制國有九年之儲可以備非常救災厄也堯湯有十年之蓄遭九年洪水七載大旱不聞饑饉相望捐棄溝壑者蓄積多故也夫螟螣秋生而秋死一時為災而數年乏食今一人耕而百人食之其為螟螣亦甚矣 小憲艷紀

宋武帝時元日雪羣臣以為嘉瑞上曰朕臨御方存心百姓如得年登豐稔即為大瑞雖獲麟鳳亦何用焉 太平御覽





珍惜民天

夫聖王在上而民不凍饑者非能耕而食之織而衣之也  
 為開其資財之道也民貧則奸邪生貧生於不足不足生  
 於不農不農則不地著不地著則離鄉輕家民如鳥獸雖  
 有高城深池嚴法重刑猶不能禁也此饑寒交迫於外廉  
 恥盡泯於中禍且不可支矣夫珠玉金銀饑不為食寒不  
 為衣然而眾貴之者以上用之故也粟米布帛生於地長  
 於時聚於力非一日成也一日弗得則饑寒切身腹饑而  
 不得食膚寒而不得衣雖慈父不能保其子君安能以有  
 其民哉是以明君貴五穀而賤金玉百姓無不足矣

尚書通鑿

漢楊寶年九歲至華陰見黃雀為鳴臬所搏墜樹下寶取歸置箱中採  
 黃花以飼之歷百餘日飛去忽變一黃衣童子拜曰我王母使者為鳴  
 臬所搏蒙君仁愛見拯今奉以王環四枚令君子孫位登三公後果四  
 世皆公

故事白眉





憫恤物類

蓋聞至重者生命最慘者殺傷是故逢擒則奔蟻蟲猶知  
 避厄將雨而徙螻蟻尚且貪生微物尚然大者可知何乃  
 網於山罟於淵多方掩取曲而鈎直而矢百計搜羅或因  
 籠檻則如處囹圄或被刀砧則同臨剮戮憐兒之鹿舐瘡  
 痕而寸斷柔腸畏死之猿望弓影而雙垂悲淚恃我強而  
 凌彼弱理恐非宜食他肉而補已身心將安忍由是昊天  
 垂憫古聖行仁往往施皆有報鑿鑿簡策可稽願隨所見  
 物發慈悲心行方便事或恩周多命則大積陰功若惠及  
 一蟲亦何非善事苟日增而月累自行廣而福崇矣

問奇類林

宋仁宗晨興謂侍臣曰昨夜不寐甚饑思食燒  
 羊忍之每有取外遂成例恐逐夜宰殺以備非  
 時害物多矣寧忍一夕之餒不啓無窮之殺也  
 左右皆呼萬歲 通鑿






存仁益福

益不殺生者所以存仁愛也夫禽獸旁生性命同稟有父子夫婦之情有巢穴飲食之念愛憎喜懼何異於人能懷惻隱之心不忍殺戮而食以證慈悲之行則不起意殺不下手殺不眼見殺三淨是則飲食隨緣又何殺生之有且聖賢於肉食固未嘗必其有無而仁愛之及物亦何嘗間乎彼此如網解三面迹遠庖厨釣而不網弋不射宿啓蟄不殺方長不折德惠之普人蟲草木一視同仁後之不食肉者果能然乎又當知人生衣食之豐儉皆因前世脩積之淺深今日分應所受乃能節之則其福益厚矣

真西山述云

後漢盛吉為廷尉每至冬節罪囚當斷妻夜執燭吉持丹筆夫妻相對垂泣云人命至重若使決罪有一寬濫不但身叢愆戾抑且禍及子孫 自孔六帖






刑本愛民

夫人君制刑所以奉天討也輕重取舍各有攸當而欽恤之意每行於其間無非體天地好生之德也五刑之用豈淫虐以逞哉刑者聖人之所以愛民之具也其禁暴止殺之意必本乎至仁湯武置天下於仁義禮樂德及子孫累數十世此天下所共聞也秦始皇置天下於法令刑罰禍幾及身子孫誅絕此天下所共見也是非其明效大驗耶人之聽言必以其道其事觀之莫敢妄言今或言禮義之不如法令教化之不如刑罰人主胡不引殷周秦事以觀之有天下者可不崇前聖欽恤之意以為鑒戒乎

聖學  
心法



宋太祖讀二典嘆曰堯舜之罪四凶止從投竄何近代法網之密乎謂宰相曰五代諸侯跋扈有枉法殺人者朝廷置而不問人命至重姑息藩鎮當若是耶自今諸州決大辟錄案奏聞付刑部覆視之遂著為令

集事淵海



密法陷民

國朝太祖覽刑部尚書開濟議法巧密而惡之曰刑罰本以禁民爲非使之遠罪直非以陷民也汝張此密法以罔加無知無乃用心大刻夫竭澤而魚害及鯤鯢焚林而田禍及麇穀巧密之法百姓其能免乎又諭劉惟謙曰膏梁所以克饑藥石所以療病使無病之人舍膏梁而餌藥石適足以害身仁義者養民之膏梁也刑罰者懲惡之藥石也故爲政者舍仁義而專務刑罰是以藥石毒民非善治之道也今擢爾爲刑官之長用法之際常體古人欽恤之意則張釋之于定國皆可爲法矣爾其勉之 皇明寶訓

漢宣帝時年豐人少利時大司農中丞耿壽昌上計令郡國皆築倉以穀賤時增其價而糶以利農穀貴時減價而糶以利人名曰常平倉百姓利之皆著爲令 白孔六帖






備粟恤民

夫人君之為治所以延國祚安君位者莫急于為民故凡  
 國家之所以脩營積貯何者而非為民哉是故豐年則斂  
 之非斂之以為已利也收民之有餘以備他日之不足凶  
 年則散之非散之以為已惠也濟民之不足而發前日之  
 有餘安養斯民之政則開其資財之道開資財有道在墾  
 土田通山澤使地無遺利禁游民興農業使民無餘力如  
 此則蓄積多矣雖有天災數年之水旱而吾所以為之備  
 者具之有素安能為吾民之患哉是以古之善為民治者  
 恒備於未荒之先若救之患之後者策斯下矣

入學行  
義補

孔子觀於魯相公之廟有欹器焉問於守廟者曰此謂何器對曰此蓋為宥坐之器孔子曰吾聞宥坐之器  
 虛則欹中則正滿則覆明君以為至誠故常置之坐側 頃者弟子試注水焉乃注之水中則正滿則覆  
 喟然嘆曰嗚呼夫物惡有滿而不覆者哉 家語

夫子





謙畏無驕

周成王封伯禽於魯辭去周公戒之曰子其無以魯國驕士矣吾聞德行廣大而守以恭者榮土地博裕而守以儉者安祿位尊盛而守以卑者貴人衆兵強而守以畏者勝聰明睿智而守以愚者益博聞多記而守以淺者廣此六守者皆謙德也夫貴爲天子富有四海不謙者先天下亡其身桀紂是也可不慎乎故易曰有一道大足以守天下中足以守國家小足以守其身謙之謂也天道虧盈而益謙地道變盈而流謙鬼神害盈而福謙人道惡盈而好謙是以存亡禍福其要在身三人敬慎子其戒之哉

說苑

齊桓公盟於貫澤有憂中國之心不召而至者江人黃人也葵丘之會桓公震而矜之叛者九國諸侯謂其自有美大之德失其重之例也而叛矣

公羊傳





傲物招殃

漢高祖八年討韓王過趙趙王敖朝見帝執子壻禮甚恭  
 上箕踞慢罵之趙相貫高等皆怒壁人於廁中刺帝上欲  
 宿心動而去噫自古觀之人君之道無驕無奢所存者仁  
 與義也高帝起於布衣天命始興之時當自敬賢禮士無  
 肆其心無縱其欲方能保國保身猶恐弗克何迺恃其福  
 命之歸帝王之尊驕慢傲物王臣氣忿不平忽起刺殺之  
 謀雖幸脫於毒手後弗能自重恃其勝楚之勇親擊黥布  
 為流矢所中而崩其卿大夫士庶觀此豈不深可儆戒  
 云君子無眾寡無小大無敢慢此其所以為美歟

綱目



唐張延賞判度支有獄頗寃濫公召吏  
 嚴戒明日案上有帖子云錢三萬貫乞  
 勿問此獄公怒更促之明日復帖子云  
 十萬貫遂止不問延賞曰錢十萬通神  
 吾懼禍及不得不止 山堂肆考



錢為神物

夫錢之為體有乾坤之象為世神寶親愛如兄字曰孔方  
 無翼而飛無足而走解嚴毅之顏開難發之口無遠不往  
 無深不至京邑衣冠疲勞講肆厭聞清談對之睡寐見我  
 家兄莫不驚視錢之所祐吉無不利由是論之可謂神物  
 無德而尊無勢而熱排朱門入紫闥危可使安死可使活  
 貴可使賤生可使殺是故忿爭非錢不勝幽滯非錢不拔  
 怨讐非錢不解令聞非錢不發洛中朱衣當塗之士愛我  
 家兄皆無已極執我之手抱我終始凡今之人惟錢而二  
 噫貪泉之害不啻陷穽清仁之士白不惑矣 太平御覽



晉王衍雅尚玄遠口未嘗言錢其妻欲試之  
 夜令婢以錢遶床不得行衍晨起見錢闌之  
 命婢舉此阿堵物去 山堂肆考



錢知神愚

晉魯褒作錢神論以疾當時蕭綜作錢愚論以譏蕭寵其  
 義各有歸主然錢豈能神愚哉如遇楊伯起吳隱之錢安  
 得神乎如遇張延賞崔烈之錢豈終愚哉故知神愚在人  
 非錢是係明矣熟味二論尤不若東谷李彥之錢論尤為  
 剴切也其詩云半輪殘月掩塵埃依稀猶有開元字想見  
 清光未破時買盡世間不平事蓋古人詠錢其高曠有如  
 此者噫錢非不神也能神於金塲之董卓而不能神於陰  
 山之太宗能神於銅山之鄧氏而不能神於酌貪泉之刺  
 史孰謂孔方子能移伯夷之清勁伊尹之一介不取乎

問奇 類林

隋文中子王通曰婚娶而論財夷虜之道也君子不取 且鄉古者男  
 女之族各擇德焉不以財為禮早婚少娉教人以偷妾媵數名教人  
 以亂且貴賤有等一夫一婦庶人之職也 小學





### 婚義垂風

夫婚娶而論財夷虜之道也今世之貪鄙者將娶婦先問資裝之厚薄將嫁女先問聘財之多寡是乃駟僮賣婢鬻奴之灑豈得謂之士大夫婚姻哉世俗生男則喜生女則戚夫婦人倫之始聖王所重惟尚財而不論行取勢而不論年因之敗德蠹家離間骨肉者多矣人能思良婦為起家之本務在配德勿援權門必求貞賢勿貪貨利苟得貧家勤慎之女彼必安貧守分孝親和家尤為生福之源程子曰世人多慎於擇婿而忽於擇婦其實婿易見婦難知如或不慎於初必為禍胎所係甚重豈可忽諸 知非錄

唐李涉博士過九江至皖口遇盜問何人從者云李博士也其豪首云若是李涉博士不用剽奪久聞詩名願題一篇足矣涉贈一絕春雨瀟瀟江上村綠林豪客夜知聞相逢不尺相迴避世上如今半是君眾笑而退 全唐詩話






盜言可聽

夫有為盜者官訊之曰爾盜也試言盜狀盜佯不省云何  
 名為盜官曰汝胠篋竊財為盜盜笑云即公言余何為盜  
 若官人真盜也當為儒生時曾不思考究天人治亂經濟  
 皇輿惠澤黔首一旦權勢入手借以行奸攫取大利白晝  
 殺人都市虓暴苞苴一入三尺盡廢黃金有權白日無光  
 赴海填壑不知紀極錢神通天官譽大起真天下之巨盜  
 也今穿窬竊人一物即以盜論刑官人高坐拱手搜巨萬  
 而猶不失官譽是舍冠裳大盜而問民間小偷耶官即釋  
 之而不究古云竊鉤者誅竊國者侯非止一日矣 鴻苞

宋高宗欲為岳飛營第飛辭曰金虜未滅何以家為帝  
 問天下何時太平飛曰文臣不愛錢武臣不惜死天下  
 太平矣 通鑒





釋警貪風

夫文臣愛錢武臣惜死其來尚矣今之武臣不獨惜死抑且愛錢何也武臣愛錢非特自愛為文臣愛也蓋勢不得不愛也試觀總副參遊諸弁有一不以上剝下者乎又試觀撫按司道諸公有一不以文取武者乎總之皆軍實也餉安得不竭兵安得不困而武畧安得不廢弛哉乃推原其本皆因世之儒生縟文勦說以功名到手為得志恣意貪婪擾亂世界非一日矣如改弦求音而聽之須擇素操鄉馨德行之士加以嚴勅舉薦連坐之法則在廷自多真君子在外自無貪競風愛錢惜死之弊不令而化矣

漫錄  
評

唐張嘉貞不營家產有勸告曰田宅者嘉貞曰吾貴為將相何憂寒餒若獲其罪雖有田宅無所用比謂士廣占良田身沒之日適足為無賴子弟酒色之資吾不取也聞者是之 通鑿





益過生怨

漢疏廣為太子太傅乞骸骨加賜黃金歸鄉里日供具設酒食請族人故舊相與娛樂數問其金尚有幾許輒賣以共具居歲餘廣子孫竊謂其昆弟老人廣所信愛者勸廣置田宅為子孫計廣曰吾豈老悖不念子孫哉顧自謂舊田廬令子孫勤力於其中足以供衣食與凡人齊今復增益之以為贏餘但教子孫怠惰耳賢而多財則損其志愚而多財則益其過且夫富者眾之怨也吾既無以教化子孫不欲益其過而生怨又此金者聖主所以惠養老臣也故樂與鄉黨宗族共享其賜以盡吾餘日不亦可乎

藝林  
精言

洪向長字子平河內朝野人隱居不仕性尚中和讀易至損益卦喟然嘆曰吾已知富不如貧貴不如賤但未知也何如生耳建正中男女婚嫁既畢勅斷家事勿相關當如我死也遂與同好比游禽慶俱遊五岳名山竟不知所終  
萬姓編語






擔當了悟

夫士君子生於天地間便要擔荷世界如今不肯檢束身心只是這擔子放了且看挑擔的人擔子一上身便須急急走那有工夫說閒話做閒事今出處辭受大節都放過了念及於彼可為寒心雖勉強立百千萬年話誰能信耶人生在世生死蜉蝣百年一瞬功名富貴過眼浮雲六尺軀終化為塵土況身外物乎提醒起來把平日一切妄念搜剔根株逐一斬絕或遇私心竊發世情牽掛處如孤軍遇敵背死猛戰一場掃蕩盡了譬如死了一般焚了一般另轉一番世另做一番人免得終身墮落苦海

理學平  
譚



老子與關令尹云名與身孰貴身與貨孰多得與失孰病甚愛必大費多藏必厚亡知足不辱知止不殆可以長久又云罪莫大於可欲禍莫大於不知足咎莫大於欲得故知足之足常足矣 六子全書



攘攘勞生

夫人之有生營營擾擾或追憶其既往逆料其將來外則苦其身以事勞攘內則苦其心以密思慮用以爲周身之防善後之策總之云勞生然或計未周而生先盡慮未及而形難留此身未生之前與此生已盡之後何者爲我迺知是身非實氣聚則生氣返歸空生理無常一空常在達生知命者委順以待之耳先儒云透得名利關方是小休歇余云透得生死關此是大休歇古人有云得者時也失者順也自少而得壯自壯而得老其得也以時至而得也至壯而失少至老而失壯其失也以順時而失也

龍溪集

忠武王時乘小驢放汜湖一日至香林園  
 造宴處盡醉而歸書詞遺謝云冬日春山蕭瑟靜春來山煖花濃少年衰  
 老與花同世間名利客富貴與貧窮貪忙不是長生藥清閑不是死門風  
 勸君識取主人方只一味盡在不言中 堯山堂稿





恬退鮮知

夫造化之於人不靳於功名富貴而獨靳於閒天地之間  
機發輪轉無一息之停天地且不得閒而況於人乎高爵  
厚祿清資顯轍不知其幾而樂恬退者甚鮮日惟置產營  
第不獲一見而身先亡者有矣幸而家食正好偷閒顧乃  
囊篋鎖鑰惴惴於手收支簿書介介於懷豈惟日忙夜夢  
亦擾擾所謂好山水好風景何嘗識其旨趣徒爲勞生雖  
死不悔是誠守錢虜爲兒孫作馮牛也噫尤有甚者始爲  
兒孫作蛇蝎矣故曰不是閒人固不得閒人不是等閒人  
鮮得知足之樂所以只忙迫一場便休而不悟哀哉

知非錄



